

每週經課朗誦經文(巴克禮漢羅/教羅)2012/12/09

共同經課 - 1 瑪拉基書三章一節~四節

1 萬軍 ê 耶和華講，看 ah，我差我 ê 使者，伊 beh tī 我 ê 頭前備辦路；lín 所 chhē ê 主，beh 忽然到祂 ê 殿，盟約 ê 使者，就是 lín 所欣慕 ê，看 ah，祂來 lah。2 獨獨祂來 ê 日，chī-chūi 當 oē-khí；祂顯現 ê 時，chī-chūi khiā-oē-tiâu？因為祂親像鍛鍊 ê 火，koh 親像漂布 ê 鹼(kiⁿ)。3 祂 beh 坐 teh，親像鍛鍊銀 hō伊清氣 ê，來清氣利未 ê kiáⁿ 孫，鍛鍊 in 親像金銀；in 就 beh 憑公義獻禮物 hō耶和華。4 Hit 時猶大 kap 耶路撒冷所獻 ê 禮物，beh 得 tiòh 耶和華歡喜，親像舊時 ê 日，古早 ê 年。

共同經課 - 2 路加福音一章六十八節~七十九節

68 Tiòh o-ló 主，以色列 ê 上帝，因為伊有看顧伊 ê 百姓來贖回伊；69 替咱興起拯救 ê 角，Tī 伊 ê 奴僕大衛 ê 家。70 照伊 tùi 有世間以來用伊聖 ê 先知 ê 嘴所講 ê，71 就是救咱脫離對敵 kap 見若怨恨咱 ê 人 ê 手，72 來行憐憫 tī 咱 ê 列祖，來記念伊聖 ê 約；73 就是 kap 咱 ê 祖亞伯拉罕所 chiū ê choā，74 Hō咱已經脫離 chiah-ê 對敵 ê 手，75 一世人 tī 伊 ê 面前用聖用義無驚來服事伊。76 嬰 á ah，你也 beh 稱做至高 ê 先知，因為你 beh 行 tī 主 ê 面前來備辦伊 ê 路，77 Hō伊 ê 百姓 tùi 得 tiòh 赦罪，就知拯救 ê 恩，78 為 tiòh 咱 ê 上帝憐憫 ê 心，Tùi án-ni hō早起時 ê 日 tùi 頂面來到 tī 咱，79 來照 hiah-ê 坐 tī 烏暗 kap 死蔭中 ê 人，Chhoā 咱 ê 腳入平安 ê 路。

共同經課 - 3 腓立比書一章三節~十一節

3 我見有 siàu 念 lín，就感謝我 ê 上帝，4 tak pái 為 tiòh lín 眾人祈禱 ê 時，常常歡喜來祈禱，5 因為 lín tùi 頭一日到 taⁿ，saⁿ-kap 有份 tī 興起福音；6 我也深信起頭做好 ê 工 tī lín ê，beh 成伊到 tī 耶穌基督 ê 日；7 koh 我為 tiòh lín 眾人有 chit 號心志是合宜，因為 lín 常常 tī 我 ê 心內，無論我 tī 鐵鏈中，以及辯明來堅固福音 ê 時，lín 眾人 kap 我有份 tī 恩典。8 因為上帝 kā 我做干證，我體基督耶穌 ê 心，有怎樣戀慕 lín 眾人。9 Koh 我所求 ê 就是 hō lín ê 仁愛，tī 智慧以及 tak 樣 ê 曉悟，充滿又 koh 充滿，10 致到 lín 會驗出 hiah-ê khah 好 ê 事，hō lín 純全無塞礙，到 tī 基督 ê 日；11 用義 ê 果子滿滿，就是 tùi 耶穌基督有 ê，beh hō 上帝得 tiòh 榮光 o-ló。

共同經課 - 4 路加福音三章一節~六節

1 Th ê-pì-liú 該撒坐位 ê 十五年本丟彼拉多做猶太 ê 總督，希律做加利利分封 ê 人君，伊 ê 兄弟腓力做 Í-thó-tī-a kap tek-liáp-khó-ní 地方分封 ê 人君，Lū-sat-liap 做 A-pí-lī-ní 分封 ê 人君，2 A-ná kap Kai-a-hoat 做祭司頭 ê 時，撒迦利亞 ê Kiáⁿ 約翰 tī 曠野裡，上帝 ê 話到 tī 伊。3 伊就到約旦河 ê 四方，傳反悔 ê 洗禮，hō 人得 tiòh 赦罪。4 親像先知以賽亞冊裡所記 ê 話，講，有 teh 叫 tī 曠野 ê，伊 ê 聲講，備辦主 ê 路，修直伊 ê 小路。5 Chiah-ê 山谷 lóng beh thūn-tīⁿ，Chiah-ê 大小 ê 山頭 lóng beh hō伊低，彎曲 ê，beh hō伊直，Khâm-khiát ê，beh hō伊平；6 凡有肉體 ê beh 看見上帝 ê 拯救。